

PREDGOVOR

Ova publikacija je rezultat rada Sarajevskog otvorenog centra i saradnika/ca koji/e su sudjelovali/e na prvoj Akademiji političkog liderstva, održanoj od 29. juna do 5. jula 2012. godine u Sarajevu, a koju je organizovao Sarajevski otvoreni centar uz podršku Ambasade Kraljevine Norveške u BiH. Akademija je okupila mlade ljude koji dolaze iz različitih političkih stranaka i nevladinih organizacija u BiH. Cilj Akademije političkog liderstva jeste jačanje kapaciteta mladih ljudi koji se žele aktivno baviti politikom i sudjelovati u procesima donošenja odluka.

S obzirom na to da mladi/e političari/ke nisu dovoljno zastupljeni/e u političkim strukturama niti imaju mogućnost donošenja odluka, edukacija o političkom sistemu i različitim društvenim segmentima koji utječu na političke procese je neophodna kako bi se stvorili preduslovi za njihovo učešće. Važna komponenta ove akademije jeste sudjelovanje žena u politici, tako da su neki od modula akademije posvećeni ulozi žena u političkim strankama i njihovom pozicioniranju unutar stranačkih tijela. Učesnici/e akademije su imali/e priliku upoznati neke od političara/ki iz izvršne i zakonodavne vlasti u BiH, te predavače/ice iz BiH, Hrvatske i Srbije koji/e imaju višegodišnje iskustvo u akademskom, političkom i društvenom radu. Akademija političkog liderstva, u trajanju od sedam dana, pokrila je teme koje se tiču političkog sistema BiH, ljudskih prava, ustavnih reformi, državnih finansija, lokalne samouprave, izbora, obrazovanja, medija, evro-atlantskih integracija BiH, te pitanja liderskih vještina.

Na prvu Akademiju političkog liderstva prijavilo se 142 mladih ljudi iz različitih političkih stranaka i nevladinih organizacija u BiH. Na njoj su sudjelovali/e mladi/e političari/ke koji/e dolaze iz sljedećih političkih stranaka: Demokratska narodna zajednica (DNZ), Demokratska partija (DP), Hrvatska demokratska zajednica (HDZ), Hrvatska demokratska zajednica 1990 (HDZ 1990), Narodna demokratska stranka (NDS), Narodna stranka radom za boljitak (NSRZB), Naša stranka (NS), Nova socijalistička partija (NSP), Partija demokratskog progresa (PDP), Socijaldemokratska partija (SDP), Stranka za BiH (SBiH), Savez nezavisnih socijaldemokrata (SNSD), Stranka demokratske akcije (SDA), Savez za bolju budućnost (SBBiH), te iz nekoliko udruženja: Asocijacija studenata Fakulteta političkih nauka Sarajevo, Atlantska inicijativa, Udruga mladih Dnevni boravak, Vijeće mladih Mostara, Sumero. Također, želimo naglasiti da smo imali učesnike/ce iz različitih dijelova BiH: Banje Luke, Bihaća, Brčkog, Fojnice,

Gruda, Kiseljaka, Modriče, Mostara, Pala, Ribnika, Sarajeva, Šamca, Širokog Brijega, Tuzle, Ugljevika i Zenice.

Ovo je druga publikacija Sarajevskog otvorenog centra koja izlazi u okviru edicije *BH Politika*. Tekstovi koji se nalaze u ovoj publikaciji predstavljaju izlaganja predavača i predavačica Akademije političkog liderstva. Publikaciju smo podijelili na tri dijela: **Sistem, Prava i Politika**. U prvom poglavlju pod nazivom **Sistem** nalaze se tekstovi Zarija Seizovića (*Etno-mobilizacija i institucionalna diskriminacija u Bosni i Hercegovini: kratka povijesno-pravno-politološki diskurs*; Valery Perry: *Ustav Bosne i Hercegovine: stanje, izazovi i šanse*; Miroslava Živanovića: *Lokalna samouprava u Bosni i Hercegovini*; Svetlane Cenić: *Država, finansije, budžet* i Vanje Matić: *NATO i primjena rezolucije 1325 Vijeća sigurnosti UN o ženama, miru i sigurnosti*. U drugom poglavlju pod nazivom **Prava** nalaze se tekstovi Saše Madackog: *Uvod u ljudska prava*; Besime Borić: *Socijalna prava u BiH*; Adnana Kadribašića: *Nacionalni mehanizmi za ravnopravnost spolova u BiH* i Nenada Veličkovića: *Nacionalizam u bošnjačkim, hrvatskim i srpskim čitankama*. U trećem poglavlju pod nazivom **Politika** nalaze se tekstovi Tomislava Damnjanovića: *Kampanja za početnike* i Julie Mikić: *Liderske vještine za mlade aktiviste i aktivistice u BiH*.

Sarajevski otvoreni centar svojim programima želi utjecati na povećanje učešća građana i građanki u političkim odlukama i to kroz edukaciju i informisanje o političkim procesima, institucijama i akterima. Smatramo da je za jačanje demokratskog društva neophodno jačanje građanske svijesti o političkim tokovima, nadgledanje državnih institucija, te utjecanje na povećanje njihove odgovornosti. Povećanje kapaciteta i znanja članova i članica stranaka i nevladinih organizacija znatno utječe na odgovornu politiku koja će doprinjeti izgradnji društva jednakih mogućnosti.

Sarajevski otvoreni centar će nastaviti da se zalaže za bolju saradnju civilnog društva i političkih stranaka kako bismo postigli viši stepen u poštivanju ljudskih prava. Iskreno se nadamo vašim kritikama, pohvalama i komentarima.

Arijana Aganović i Saša Gavrić